


NA'AN BALEI

LUNG KAYAN

BORNEO LITERATURE BUREAU



NA'AN BALEI LUNG KAYAN

kenan

JOSEPH ANYIE LA'ING

na-terang kenan

JUSTIN KIRIM



BORNEO LITERATURE BUREAU

© BORNEO LITERATURE BUREAU, 1968

Bara Asi

Akui me'uk sayu kenep men Mr. C. H. Southwell,
aleng masi akui nemei tuk balei adui alem behup
anih. Usi'kui deng bayen kahum tebara en na'uk.

Behup patem alem Borneo Literature Bureau
kenan Varityper dahin Headliner.

Na-ngelua' halah-gaben kelua' alem Tana & Tuken
Pelitah, Sarawak.

Katap-ngalung ha' Pelitah Amin Katap-ngalung,
Kuching, Sarawak.

Vincent Kiew Fah San, Pelitah Tagung Katap-
ngalung.



HUANG

				<i>Li'ap</i>
1.	Laké' Elah Dahin Beruk	1
2.	Lima Peharin Aleng Selap	13
3.	Laké' Kebirang Dahin Doh Sii	29
4.	Ditut Dahin Bakéh Na' Tuping	33
5.	Sian Dahin Kapit Pak Gahet	39
6.	Laké' Beruk Tei Ngayau	46

TULANJI

LAKÉ' ELAH DAHIN BERUK

Men una' aya', té' nah ji kelunan aran na' Laké' Elah. Laké' Elah nih dep kah murip nusi' té' taman hinan dahin harin, danin nusi' pah té' sepun doh dahin sepun aké' na' aleng seng tuboh iha'. Té' kah daha' panak na' aleng ha' su, bi daha' nah awi muau té' iha' avin usi' loh sayu barik na' dahin daha'. Asen javeng Laké' Elah peji dahin kelunan iha' meté' pano' nah anan.

Dekaya' tangen nah Laké' Elah nih dih. Barik na' ketu barik na' loh kah em payan pebalui. Kelunan aleng peji uma dahin na' nan pah uh hungo' lan té' barik ji'ek na' nan. Sa' nei dekaya' Laké' Elah nih sa' siha' pah urip na' nyadang tua em té' tuman na' melo' tuboh amin na' la'an. Hino' ha' tei itih kah iha' meté' peluvat kelunan aleng deng na' puyah. Daha' aleng mahing men uh iha' nusi' kah iha' deng peluvat daha'.

Ji dau la'an lun Laké' Elah nan pah seng ngenep tei kakah ngaso' dahin daha' aleng bangu atau kahum lan lan. Seng usi' pah daha' kelunan aleng tei ngaso' anih geri iha' bi masi pah daha' jam neng ji'ek na' tih ngioh daha'. Mina pah iha' ngenep tei dahin daha' avin iha' ngenep kelunan bangu. Alem kenep na tih ké' sayu ita' kahum usi' ita' nuno' la'ei bé' bavui avin daha' kahum aleng deng nyi'un.

Daha' tei ngaso' anih dua, penu penu aruk aya'.
Ha'ut ha'ut kelunan té' geri bakin dahin malat, bi
Laké' Elah nih la'ung bunei tua iha' em ngenep geri
malat dahin bakin.

Lun daha' aleng ngaso' dahin Laké' Elah nih dih
pah aleng té' ji lung ungei aleng tekep kurin daha' té'
bavui. Napah lim nah daha' tei ujung tana tih. Té'
Laké' Elah nih dih, iha' pah aleng baya lan lan men
daha' kelunan kahum anih dih. Kelung lim lim daha'
aleng té' malat tua nah iha' tei una' men uh iha'. Tei
jeleng aleng té' ngayan bavui tih ké' lun petat nah daha'
ngaso' geri aso' daha' tih dih. Té' Laké' Elah ji'ek
nih dihte ngioh daha' ji peng pah iha'. Kelunan aleng
dahin na' tei anih, kelunan maget lim lim.

Ji-angun aso' daha' mangang aleng dahin na' nih
dih, lun petat tua nah kelunan sekuna' tei livoh angang
aso' daha' nan dih. Laké' Elah nih dih ké' usi' iha'
tei ngioh daha' aleng kahum avin usi' té' malat dahin
bakin na'. Tega lim lim nah tulan té' tana aleng
ngavan daha' tei ngaso' anan dih kenan ha'ui kelunan
mengjui dahin haruh aso' daha' nan dih. Tei tei tua
nah angang aso' daha' nan dih tei su awi ita' pekatah
dih ké' uh tapah kahuk ta' té' daha' aso' anan dih. Usi'
loh nah daha' pekayuh kepit seng tei livoh angang aso'
daha' nan dih la'an.

Lun daha' pekuhuk tua nah mavéh pepeng seng tei
pala kuman avin ji ji tulan pah daha' nusi' té' lematei.

Ngetep ya' tua nah daha' kuman em té' nun nun ket
aleng daha' kan. Uh daha' kuman ké' lun kelunan
aleng geri daha' tih nah pepala seng mujap kahum, hi
aleng em té' behi ji ji men daha' kah aleng lingo' avin
daha' sektat tua tegu aso' daha' mangang.

Uh daha' mujap putung la'ung daha' nan dih ké',
beka' ji la'ung aleng em té'. Kelunan pepala pepteng
nah hi aleng em té' tinan. Lun ji laké' kuma' nah
"Laké' Elah, laké' aleng nyelanguk aréh dih aleng em
té' men telo' tinih, akui ngio' patei patei iha' aleng
lingo' kurik."

Daha' ngio' lim lim nah Laké' Elah lan kah aleng
em té' men daha'. Kitan daha' lim lim nah barik Laké'
Elah nih dih meté' peluvat kelunan. Lun daha' kuma'
lim lim, "sayu tam tei uli tua pala aruk tih avin levi
nah dau nih, jarun itam ilau iha' pah la'an."

Té' Laké' Elah nih dih té' nah iha' tepaka' tua
nyihuk em jetu loh loh kaséh tei panau ilau daha' aleng
dahin na' nih dih. Nguhuk daha' pah iha' em kaséh.
Tei tei tua laké' luyoh luyoh la'au em té' kanen, en
na' kanih nyangan butit na' tih.

Iha' kuma' nah alem la'ung na', "daha' em putau
akui nah anih ji'ek kurik. Sayu nah akui tei liyung
tua alem tu'an nih."

Tei nah Laké' Elah nan dih panau tung tung tua.
Ino' iha' tei hitih kah iha' ngivah bua ujung kayo' tih.
Iha' pah em deng naken avin kenan la'au na' tih.
Kuman la'an tulan en daha' gak tua nah ha'.

Laké' Elah pah tei ateng ha' peng peng beruk puyah
bua nakan. Nakan anan liva lan lan bua na'
javeng daha' ngebua. Awi jamat tua nah Laké' Elah
ji'ek tei pala na'. Ji angun nah daha' lim lim beruk
anan nyakat iha'. Nusi' nah iha' putau. Tei tua iha'
nyudung daha' avin iha' ngenep lelan kuman bua anan.
Daha' beruk anan pah ngeligem iha' lim lim.
Laké' Elah pah medéng (nya'ui) lelan ketu hengan
na'. Daha' beruk anan geri nah iha' naken
té' ji kayo' tanyit aleng bau lelan. Ateng nah daha'
ujung tanyit anan, en daha' beruk anan ngaput nah usu
dahin kudak na'. Tanyit anan iha' nah uma ngavan
daha' daha' beruk anan tudu. Daha' laja' beruk anan
meteng nah Laké' Elah, "Nun nun ket seng im akei,
sayu im bara jah kamé' jam tei ilau ket men ika'."
Té' nah ji angun, lun muham nah Laké' Elah nan dih.

"Muham na nun ka' Laké' Elah," ken laja' beruk
men iha'.

"Akui ilau bua ek kani anih, pui," ken Laké' Elah
nyu'ei iha'.

Laja' beruk anan pah tei ilau daha' dipen na' tei
ilau bua men Laké' Elah nan dih.

Dau malah patem nah daha' tei. Lim lim ketu daha' beruk tinan ngenep lim lim daha' tei.

Uli nah daha' jaka' leví dau. En Laké' Elah nan dih ineng bua kelan daha' beruk anan dih ké', kahum lelan. En daha' beruk anan dih nyihu nah iha' kuman na'. Uh Laké' Elah kuman bua anan dih ké' muham pah iha' la'an.

"Nun im ilau nan Laké' Elah?" ken daha' beruk anan nah men Laké' Elah nan dih.

"Akui akei ata' ek du'i anih," ken Laké' Elah men daha'.

Men uh anan dih ké', tei nah daha' beruk anan dih leva ata' men Laké' Elah ji'ek nan dih. Uli daha' leva ata' ké' en Laké' Elah peklet nah ata' anan dahin sebéh aleng en netuk anan dih.

Malah dau ji ké' muham pah Laké' Elah nan dih ajen.

"Nun im akei nan?" ken daha' beruk anan dih meteng iha'.

"Kerei nih akui akei ikam tei ilau tih men akui."

Tei nah daha' beruk anan dih tei ilau tih anan dih.

MAKLUMAT SELANJUTNYA BOLEH DIDAPATI DI:

KOLEKSI BORNEO

Pusat Dokumentasi Melayu Tun Hamdan Sheikh Tahir
Dewan Bahasa dan Pustaka Cawangan Sarawak,
Jalan Tun Datuk Patinggi Haji Abdul Rahman Yaakob,
Petra Jaya,
93050 Kuching, Sarawak.

Telefon: 082 – 227 000
Faksimile: 082 – 227 088
E-mel: eborneo@dbp.gov.my

“Memelihara Warisan Memupuk Wawasan”

